



Broj: 01-50-1-15-30/08

Sarajevo, 4. juna 2008. godine

## ZAPISNIK

30. sjednice Predstavničkog doma  
Parlamentarne skupštine Bosne i Hercegovine,  
održane 4. juna 2008. godine

Sjednica je počela u 12,25 sati. Prisustvovao je 41 poslanik.

Iz Vijeća ministara BiH sjednici su prisustvovali predsjedavajući Vijeća ministara BiH Nikola Špirić, ministri Sven Alkalaj, Tarik Sadović i Dragan Vrankić, te zamjenici ministara Srđan Arnaut, Vilim Primorac, Tarik Sadović, Senad Šepić, Igor Crnadak i Veselin Poljašević.

Iz međunarodnih organizacija sjednicu su pratili predstavnici: OHR-a, OSCE-a, nekih ambasada i nevladinih organizacija.

Predsjedavajući Lozančić obrazložio je izmjene i dopune u prijedlogu dnevnog reda i podsjetio da je on usaglašen na sjednicama Kolegija Doma i Kolegija u proširenom sastavu.

Predsjedavajući Lozančić otvorio je raspravu o dnevnom redu. U raspravi su učestvovali: Rifat Dolić, Husein Nanić, Adem Huskić, Denis Bećirović, Branko Dokić, Drago Kalabić, Momčilo Novaković, Milica Marković, Selim Bešlagić, Milorad Živković i Slavko Jovičić.

Rifat Dolić predložio je da se u dnevni red uvrsti tačka: Prijedlog zaključka o izradi i podnošenju informacije Vijeća ministara BiH o stanju i statusu imovine države, firmi i građana BiH u zemljama nastalim raspadom bivše Jugoslavije, s prijedlogom aktivnosti na njenoj zaštiti i preuzimanju od legalnih vlasnika. Poslanik Dolić obrazložio je svoj zahtjev i rekao da se ne slaže sa stavom Kolegija u proširenom sastavu da Vijeće ministara BiH nema mehanizme da podnese ovakvu informaciju, s obzirom da je Bosna i Hercegovina 2002. godine potpisala Ugovor o sukcesiji imovine zemalja bivše Jugoslavije.

Husein Nanić predložio je da se u dnevni red uvrsti tačka: Razmatranje aktuelnog stanja u Nogometnom savezu BiH. Također je predložio i usvajanje zaključka kojim bi se zadužilo Ministarstvo pravde BiH i Ministarstvo civilnih poslova BiH da, zajedno s nadležnom komisijom Parlamentarne skupštine BiH, razmotre situaciju u vezi s dešavanjima u Nogometnom savezu i preduzmu potrebne aktivnosti iz svoje nadležnosti kako bi Nogometni savez obavljao svoju javnu i povjerenu mu funkciju u interesu sporta i BiH a u skladu s javnim ovlaštenjima.

Denis Bećirović predložio je da se kao tačka dnevnog reda razmatra: Informacija o odlikovanjima i priznanjima koja je od 1992. do 1995. godine uručio najtraženiji ratni zločinac Radovan Karadžić. Rekao je da je, u skladu sa stavom Kolegija Doma ,od 20.5.2008., dostavio odgovarajući materijal u pisanoj formi.

Replike na pomenuti zahtjev poslanika Bećirovića iznijeli su: Branko Dokić, Drago Kalabić, Momčilo Novaković, Milica Marković, Milorad Živković i Slavko Jovičić.

Momčilo Novaković predložio je da se dnevni red dopuni tačkom: Prijedlog rezolucije o osudi komunističkih režima. Takvu rezoluciju već je usvojio Evropski parlament, rekao je poslanik Novaković i dodao da je saglasan da se, ako Dom tako odluči, Prijedlog rezolucije uputi nadležnoj komisiji.

Predsjedavajući Lozančić dao je na glasanje prijedloge za dopunu dnevnog reda redoslijedom njihovog iznošenja.

Prijedlog Rifata Dolića da se u dnevni red uvrsti tačka: Prijedlog zaključka o izradi i podnošenju informacije Vijeća ministara BiH o stanju i statusu imovine države, firmi i građana BiH u zemljama nastalim raspadom bivše Jugoslavije, s prijedlogom aktivnosti na njenoj zaštiti i preuzimanju od legalnih vlasnika, nije usvojen zbog nedostatka entitetske većine. „Za“ su glasala 22 poslanika (Federacija BiH 18, Republika Srpska

četiri), „protiv“ četiri i „suzdržanih“ je bilo sedam poslanika. Predsjedavajući Lozančić konstatirao je da će se usaglašavanje u Kolegiju obaviti u skladu s Poslovníkom.

Također, ni prijedlog Huseina Nanića da se u dnevni red uvrsti tačka: Razmatranje aktuelnog stanja u Nogometnom savezu BiH nije dobio potrebnu entitetsku većinu. „Za“ je glasalo 17 poslanika (Federacija BiH 15, Republika Srpska dva), „protiv“ dva, a 17 poslanika bilo je „suzdržano“. Predsjedavajući Lozančić konstatirao je da će se i o ovom prijedlogu izvršiti usaglašavanje u Kolegiju kao komisiji.

„Za“ prijedlog Denisa Bećirovića da se kao tačka dnevnog reda razmatra Informacija o odlikovanjima i priznanjima koja je od 1992. do 1995. godine uručio najtraženiji ratni zločinac Radovan Karadžić glasalo je 11, „protiv“ 14 i „suzdržanih“ je bilo 11 poslanika. Ovaj prijedlog nije usvojen zbog nedostatka opće većine.

Predsjedavajući Lozančić je, u skladu s članom 148. stav (2) Poslovníka, kao prethodno pitanje, dao na glasanje prijedlog da se Rezolucija o osudi komunističkih režima uputi nadležnoj komisiji na razmatranje. Sa 26 glasova „za“, jednim „protiv“ i četiri „suzdržana“, odlučeno je da se navedena rezolucija prethodno razmatra u nadležnoj komisiji.

Nakon rasprave i glasanja o prijedlozima za dopunu dnevnog reda, predsjedavajući je konstatirao da 30. sjednica Predstavničkog doma ima sljedeći

## D N E V N I R E D

1. Poslanička pitanja i odgovori;
2. Potvrđivanje odluke predsjedavajućeg Vijeća ministara BiH o razrješenju:
  - Svena Alkalaja, ministra vanjskih poslova u Vijeću ministara BiH,
  - Senada Šepića, zamjenika ministra civilnih poslova u Vijeću ministara BiH i
  - Igora Crnatka, zamjenika ministra odbrane za politiku i planiranje u Vijeću ministara BiH;
3. Zahtjev poslanika Momčila Novakovića za razmatranje Prijedloga zakona o izmjenama i dopunama Zakona o porezu na dodatu vrijednost po skraćenom postupku, u skladu s članom 126. Poslovníka;
4. Prijedlog okvirnog zakona o srednjem stručnom obrazovanju i obuci u BiH (drugo čitanje);
5. Prijedlog zakona o Agenciji za identifikacione dokumente, evidenciju i razmjenu podataka BiH (drugo čitanje);
6. Prijedlog zakona o izmjenama i dopunama Zakona o polaganju pravosudnog ispita u BiH (drugo čitanje);
7. Prijedlog zakona o izmjenama i dopunama Zakona o udruženjima i fondacijama BiH (prvo čitanje);
8. Prijedlog zakona o graničnoj kontroli, s Mišljenjem Zajedničke komisije za odbranu i sigurnost;
9. Izvještaj o radu Centralne izborne komisije BiH za 2007. godinu;
10. Prijedlog zaključka Ustavnopravne komisije povodom rasprave o Informaciji o radu Tužilaštva BiH za 2007. godinu;
11. Prijedlog zaključaka Zajedničke komisije za ljudska prava, prava djeteta, mlade, imigraciju, izbjeglice, azil i etiku povodom razmatranja Informacije predsjedavajućeg Vijeća ministara BiH u vezi s radom Državne komisije za ispitivanje istine o stradanjima Srba, Hrvata, Bošnjaka, Jevreja i ostalih u Sarajevu u periodu od 1992. do 1995. godine;
12. Prijedlog zaključaka Zajedničke komisije za odbranu i sigurnost povodom rasprave o Informaciji o stanju sigurnosti u Bosni i Hercegovini za 2007. godinu;
13. Prijedlog zaključaka Komisije za saobraćaj i komunikacije povodom rasprave o poslovanju Javnog RTV servisa BiH i mjerama za prevladavanje stanja utvrđenog revizijskim izvještajima o finansijskom poslovanju Javnog RTV servisa BiH za 2005. i 2006. godinu (rasprava na 8. plenarnoj sjednici);
14. Inicijativa poslanika Huseina Nanića sa 29. sjednice Doma koja glasi: „Zadužuje se Vijeće ministara BiH da uradi i Parlamentarnoj skupštini BiH dostavi informaciju o spremnosti institucija BiH za preuzimanje obaveza u vezi s primjenom SSP-a“;

15. Imenovanje tri poslanika iz Predstavničkog doma u Ad hoc komisiju za provođenje procedure za imenovanje:
  - a) Nezavisnog odbora kao nezavisnog tijela policijske strukture BiH,
  - b) Odbora za žalbe građana kao nezavisnog tijela policijske strukture BiH;
16. Prijedlog Kluba poslanika SDA za promjene u članstvu interparlamentarnih grupa prijateljstva;
17. Davanje saglasnosti za ratifikaciju:
  - a) Sporazuma između Vijeća ministara BiH i Vlade Republike Makedonije o saradnji u borbi protiv terorizma, organiziranog kriminala, nelegalne trgovine narkoticima, psihotropnim supstancama i prekursorima, ilegalne migracije i ostalih krivičnih djela,
  - b) Sporazuma između Vijeća ministara BiH i Vlade Republike Makedonije o readmisiji lica koja nezakonito borave,
  - c) Okvirnog sporazuma između Bosne i Hercegovine i Evropskih zajednica o pravilima saradnje koja se odnosi na finansijsku pomoć EZ-a Bosni i Hercegovini u okviru realizacije pomoći kroz instrumente pretprijetne pomoći (IPA),
  - d) Dvogodišnjeg sporazuma između (BCA) Bosne i Hercegovine i Regionalnog ureda Svjetske zdravstvene organizacije za Evropu 2008./2009.,
  - e) Budimpeštanskog sporazuma o međunarodnom priznavanju depozita mikroorganizama radi postupka patentiranja,
  - f) Protokola koji se odnosi na Madridski sporazum o međunarodnoj registraciji žigova,
  - g) Konvencije o zaštiti umjetnika izvođača, proizvođača fonograma i radiodifuznih organizacija,
  - h) Konvencije o zaštiti proizvođača fonograma od nedozvoljenog umnožavanja njihovih fonograma,
  - i) Statuta, Općih principa i Proceduralnih pravila Komisije Codex Alimentarius,
  - j) Evropske socijalne povelje (revidirana), Strazbur, 3.maja 1996.

#### **Ad. 1. Poslanička pitanja i odgovori**

Predsjedavajući Lozančić je u uvodnim napomenama rekao da su odgovore na pitanja od 28. do ove sjednice dobili poslanici:

- Sead Jamakosmanović od Ministarstva vanjskih poslova BiH, na pitanje postavljeno na 20. sjednici,
- Sadik Bahtić, Vinko Zorić i Jovan Todorović od Vijeća ministara BiH, na pitanja postavljena na 21. sjednici,
- Selim Bešlagić od Vijeća ministara BiH, na pitanje postavljeno na 23. sjednici,
- Šemsudin Mehmedović od Kolegija Doma, na pitanje postavljeno na 23. sjednici,
- Rifat Dolić od Ministarstva odbrane BiH, nakon što je na 23. sjednici izrazio nezadovoljstvo odgovorom na pitanje postavljeno na 20. sjednici,
- Jozo Križanović od Centralne izborne komisije BiH, na pitanje postavljeno na 23. sjednici,
- Salko Sokolović od Regulatorne agencije za komunikacije BiH, na pitanje postavljeno na 26. sjednici,
- Azra Alajbegović od Uprave za indirektno oporezivanje, na pitanje postavljeno na 26. sjednici,
- Snježana Rajilić je od Vijeća ministara BiH dobila obavještenje da je njeno pitanje, postavljeno na 26. sjednici, proslijeđeno Vladi Federacije BiH budući da je ono u njenoj nadležnosti.

U okviru komentara na odgovore poslanik Sadik Bahtić izrazio je nezadovoljstvo odgovorom Regulatorne agencije za komunikacije BiH, a postavljena su sljedeća pitanja:

Snježana Rajilić izrazila je nezadovoljstvo prepiskom između Vijeća ministara BiH i Vlade Federacije BiH, kao i unutar Vlade, a u vezi s njenim pitanjem postavljenim na 26. sjednici, koje se tiče aviosnimanja u pograničnom dijelu RS-a. Izrazila je nadu da će ipak dobiti odgovor na to pitanje.

Šemsudin Mehmedović izrazio je nezadovoljstvo odgovorom Zajedničkog kolegija na njegovo pitanje vezano za primjenu zakonskih odredbi Zakona o komunikacijama. Ponovio je pitanje i zamolio da se Kolegij precizno o tome odredi.

Vinko Zorić je također izrazio nezadovoljstvo odgovorom na njegovo pitanje vezano za diplomatske vize za poslanike na pola godine i zatražio ponovni odgovor.

Predsjedavajući Lozančić odmah je odgovorio na pitanje Šemsudina Mehmedovića, ali je on ipak obnovio svoje poslaničko pitanje:

Na pitanje Vinka Zorića odgovor je dao ministar vanjskih poslova BiH Sven Alkalaj.

Postavljena su i nova poslanička pitanja kako slijedi:

#### **Rifat Dolić:**

1. “Šta se može preduzeti da se spriječi diskriminacija i kršenje ljudskih prava prema osuđenima i zatvorenima u Federaciji BiH kojima je već gotovo četiri godine uskraćeno pravo na pomilovanje, nakon što je krajem 2004. godine visoki predstavnik Pede Ešdaun ukinuo Zakon o pomilovanju u Federaciji BiH, dok u isto vrijeme u cijelom ovom periodu osuđenici i zatvorenici u RS-u uživaju ovo pravo?” – pitanje postavljeno ministru za ljudska prava i izbjeglice BiH.

2. “Šta možete preduzeti na sprečavanju i suzbijanju organiziranog prosjačenja u BiH, koje je prevršilo svaku mjeru, koje ruši ugled BiH i koje vrlo često prelazi u incidentne situacije, zbog drskosti i agresivnosti biznis prosjaka i njihovih poslodavaca?” – pitanje postavljeno ministru sigurnosti BiH.

#### **Azra Hadžiahmetović:**

Ministru vanjskih poslova BiH postavila je pitanje trajanja diplomatskih viza, jer diplomatske vize za poslanike traju pola godine, a za ostale nosioce diplomatskih pasoša i do pet godina. Poznato je da su nosioci diplomatskih pasoša oslobođeni obaveze posjedovanja šengenske vize po osnovu bilateralnih aranžmana s drugim zemljama i drugih viza. S obzirom na prisustvo sjednici ministra vanjskih poslova BiH, zatražila je odmah odgovor.

Ministar Sven Alkalaj odgovorio je na pitanje odmah na sjednici. Uz ostalo, rekao je da je Pravilnikom koji je na snazi već pet-šest godina regulirano da diplomatske vize za poslanike važe šest mjeseci, te da će se u reformskim procesima koje provodi Ministarstvo razmatrati i ovo pitanje. Dodao je da je i on smatra da nema razloga da diplomatske vize traju kraće od viza za druge nosioce diplomatskih pasoša.

#### **Remzija Kadrić:**

“Predlažem Predsjedništvu BiH da ubrza aktivnosti po pitanju osiguranja službenog prijevoda presude Međunarodnog suda pravde u tužbi Bosne i Hercegovine protiv Srbije i Crne Gore u slučaju primjene Konvencije o sprečavanju i kažnjavanju zločina genocida.”

#### **Husein Nanić:**

“Dokumentom Evropske komisije Instrument za pretpristupnu pomoć, tzv. IPA projekti, BiH kao zemlja potencijalni kandidat u tom statusu ima otvorene dvije od pet IPA komponenti, i to:

1. Pomoć pri tranziciji i izgradnji institucija i
2. Prekogranična saradnja.

U okviru dozvoljenih IPA projekata BiH je aplicirala određenim projektima prema Evropskoj komisiji.

Postavljam pitanje i tražim informaciju:

1. Koji su IPA projekti kandidirani od početka realizacije projekta i kakav im je status,
2. Koji su kandidirani projekti Evropskoj komisiji po pitanju projekata za pretpristupnu pomoć za 2008. godinu,

3. Da li su institucije BiH spremne za aplikaciju i realizaciju IPA projekata?" (Pitanje postavio predsjedavajućem Vijeća ministara BiH).

**Milorad Živković:**

“Kada će doći do revidiranja dokumenta Opći pravci i prioriteta za provođenje vanjske politike BiH i kada će biti upućen u proceduru Zakon o vanjskim poslovima ili Zakon o obavljanju vanjskih poslova, već kakav mu je naziv?” (pitanje postavio ministru vanjskih poslova BiH)

**Sefer Halilović:**

1. “Šta je konkretno urađeno po pitanju pasivnog podbilansa? Ko raspolaže podatkom koliko imovine, potraživanja i obaveza nastalih prije 31.3.1992., po ovom osnovu, ima iz odnosa sa subjektima s područja bivše SFRJ i iz drugog entiteta? Šta je preduzeto povodom donošenja Izmjena i dopuna Zakona o privatizaciji u Srbiji, koji je Skupština Srbije usvojila u decembru 2007. godine?”

2. “Zašto nije pokrenut postupak provjere porijekla i postupak naplate carinskih dažbina?”  
(Pitanje postavio predsjedavajućem Vijeća ministara BiH)

**Lazar Prodanović:**

“Zašto je i na osnovu čega UIO ili druga nadležna institucija donijela odluku da se kao granični prijelaz za međunarodni, robni i putnički saobraćaj u području istočnog dijela BiH (granica sa Srbijom) koristi samo Karakaj-Mali Zvornik i da se odmah počne primjenjivati ta odluka?” (Pitanje uputio nadležnom ministarstvu u Vijeću ministara BiH)

**Mehmed Suljkanović – inicijativa VMBiH**

“Vijeću ministara Bosne i Hercegovine - pokrećem inicijativu za pokretanje postupka za izmjenu i dopunu Zakona o sistemu indirektnog oporezivanja u Bosni i Hercegovini (“Službeni glasnik BiH”, br. 44/03, 52/04 i 34/07).

**Šemsudin Mehmedović:**

“Zašto sudovi u BiH priznaju presude Trgovinskog suda u Beogradu kada nisu ispunjeni uslovi za priznavanje presuda iz **Ugovora između Bosne i Hercegovine i Srbije o pravnoj pomoći** (objavljene u “Službenom glasniku BiH”, br. 11/05) i Zakona o rješavanju sukoba zakona s propisima drugih zemalja SFRJ koji je preuzela BiH u kojem Ministarstvo pravde daje mišljenje o ispunjavanju uslova reciprociteta?”

**Snježana Rajilić:**

“Moje pitanje odnosi se na Ministarstvo saobraćaja i komunikacija BiH, a glasi – Kada će Ministarstvo saobraćaja i komunikacija BiH objaviti potrebnu literaturu koja je neophodna za polaganje vozačkih ispita po novom Zakonu o sigurnosti saobraćaja na putevima u BiH?

Ako to nisu u mogućnosti, onda je neophodno da to urade nadležna entitetska ministarstva.“

**Adem Huskić:**

„Šta je Vijeće ministara BiH preduzelo i koje radnje i aktivnosti namjerava preduzeti u vezi sa zloupotrebama u CIPS-u kako bi se spriječile dalje zloupotrebe u proceduri izdavanja ličnih dokumenata?“

Na ovo pitanje na sjednici je odgovorio predsjedavajući Vijeća ministara BiH.

**Sadik Bahtić:**

“Kada će Vijeće ministara BiH i nadležna ministarstva u skladu sa Zakonom o svojini R BiH, koji je donesen 1994. godine i još uvijek je na snazi, oduzeti imovinu bivšeg Saveza komunista, koja je nezakonito uzurpirana, opljačkana od SDP-a?“

**Momčilo Novaković:**

„Zašto nije ispunjen plan aktivnosti na zatvaranju Konzulata u Bonu i otvaranja Generalnog konzulata BiH u Frankfurtu i kada će početi raditi ovaj konzulat? Šta je s arhivom koja se nalazi u zgradi bivšeg Generalnog konzulata u Bonu i ko je zadužen za njeno čuvanje? Šta je sa zahtjevima građana koji su zaprimljeni u taj konzulat, a nisu riješeni? Kojim radnicima je produžen boravak u konzulatu i nakon termina definiranog odlukom i planom zatvaranja i iz kojih razloga?“

**Slavko Matić:**

„Da li je izgradnja mosta na rijeci Savi kao spojne točke na Koridoru Vc predviđena unutar dionice Svilaj – Odžak. Ukoliko nije, kada i kako, odnosno kojim sredstvima se planira izgradnja ovog mosta u partnerstvu s Republikom Hrvatskom u saradnji ili samostalno?“

Na pitanje je na sjednici odgovorio zamjenik ministra komunikacija i prometa BiH Veselin Poljašević.

**Ekrem Ajanović:**

„Prvo podnosim inicijativu da se umjesto imenovanja ad hoc komisija taj posao „prepusti“ Administrativnoj komisiji Parlamentarne skupštine BiH kako je i u svim drugim parlamentima u okruženju i dalje.

I druga moja inicijativa je da poslanici ne mogu komentirati odgovore, jer su to odgovori institucija i pojedinaca i ne moraju biti po njihovoj želji, nego samo mogu da postave dodatno pitanje da bi dobili drugi odgovor, odnosno pojašnjenje.“

**Velimir Jukić:**

1. „Šta preduzima Vijeće ministara BiH na suzbijanju širenja bruceloze i iskorjenjivanju ove zarazne bolesti, te sanaciji šteta nastalih zbog nje?“

2. „Zašto u salama za plenarne sjednice Parlamentarne skupštine BiH, u Velikoj sali na prvom spratu i Bijeloj sali u kojoj mi sjedimo i radimo i u salama za rad komisija i radnih tjela nema prikladno postavljenih satova?“

**Niko Lozančić:**

„ Volio bih ako je moguće da mi na sjednici odgovori predsjedavajući Vijeća ministara BiH, odnosno neko od nadležnih ministara...“

Šta konkretno Vijeće ministara BiH preduzima da poveća svoj i kapacitet pratećih službi, kako bi BiH, u skladu s obavezama koje će nastupiti nakon potpisivanja Sporazuma o stabilizaciji i pridruživanju, osiguralo pravovremeno ispunjavanje svih preuzetih obaveza BiH? I u tom smislu pitanje koje je upućeno ministru vanjskih poslova BiH – Planira li se skoro povećanje kapaciteta Misije BiH pri EU u Briselu, uključujući i kadrove i prostor?“

Predsjedavajući Vijeća ministara BiH odgovorio je na sjednici.

**Ad. 2. Potvrđivanje odluke predsjedavajućeg Vijeća ministara BiH o razrješenju:**

- **Svena Alkalaja, ministra vanjskih poslova u Vijeću ministara BiH,**
- **Senada Šepića, zamjenika ministra civilnih poslova u Vijeću ministara BiH, i**
- **Igora Crnatka, zamjenika ministra odbrane za politiku i planiranje u Vijeću ministara BiH.**

Predsjedavajući Lozančić dao je uvodne napomene, a zatim je otvorio raspravu.

Predsjedavajući Vijeća ministara BiH Nikola Špirić obrazložio je Odluku o razrješenju.

U raspravi i replikama u okviru ove tačke dnevnog reda učestvovali su: Beriz Belkić, Sadik Ahmetović, predsjedavajući Vijeća ministara BiH Nikola Špirić, Bakir Izetbegović, Rifat Dolić, Drago Kalabić, Azra Hadžiahmetović, Momčilo Novaković, Šefik Džaferović, Jozo Križanović, Milorad Živković, Branko Dokić, Niko Lozančić, Jerko Ivanković Lijanović i Selim Bešliagić.

Jerko Ivanković Lijanović predložio je sljedeći zaključak:

„Odgada se izjašnjavanje o Odluci Vijeća ministara BiH o razrješenju ministra vanjskih poslova BiH, zamjenika ministra civilnih poslova BiH i zamjenika ministra odbrane za politiku i planiranje na rok od 90 dana i zadužuje se resorna grupa da izradi izmjene i dopune Zakona o sukobu interesa, kojim ovi primjeri neće biti u sukobu interesa, u roku koji će omogućiti njihovo usvajanje prije isteka roka od 90 dana.“

„Za“ Prijedlog zaključka glasala su četiri, „protiv“ 19 i „suzdržanih“ je bilo 13 poslanika. Predsjedavajući je konstatirao da Prijedlog zaključka nije prihvaćen.

Zatim je provedeno glasanje o Odluci Vijeća ministara BiH. Odluka nije prihvaćena. „Za“ je glasalo devet, „protiv“ 22 i „suzdržanih“ je bilo šest poslanika.

### **Ad. 3. Zahtjev poslanika Momčila Novakovića za razmatranje Prijedloga zakona o izmjenama i dopunama Zakona o porezu na dodatu vrijednost po skraćenom postupku, u skladu s članom 126. Poslovnika**

Nakon uvodnih napomena predsjedavajućeg, Momčilo Novaković obrazložio je zahtjev za skraćeni postupak.

Nije bilo rasprave o zahtjevu.

Prilikom glasanja zahtjev za skraćenu proceduru nije usvojen. „Za“ je glasalo 16 (Federacija BiH 13, Republika Srpska tri), „protiv“ 18 i „suzdržana“ su bila tri poslanika.

Predsjedavajući je konstatirao da zahtjev za skraćeni postupak nije prihvaćen i da će se Prijedlog zakona o izmjenama i dopunama Zakona o porezu na dodatu vrijednost razmatrati po redovnoj proceduri.

### **Ad. 4. Prijedlog okvirnog zakona o srednjem stručnom obrazovanju i obuci u BiH (drugo čitanje)**

Predsjedavajući Lozančić dao je uvodne napomene i otvorio raspravu.

U raspravi su učestvovali: Beriz Belkić, Vinko Zorić, Momčilo Novaković, Šefik Džaferović, Ekrem Ajanović, Milorad Živković, Velimir Jukić i Bakir Izetbegović.

Najprije se glasalo o amandmanima koje su predložili Vinko Zorić i Momčilo Novaković.

Sa 24 glasa „za“ (Federacija BiH 13, Republika Srpska 11), osam „protiv“ i pet „suzdržanih“, prihvaćen je Amandman I. Vinka Zorića.

Momčilo Novaković predložio je pet amandmana. Nijedan amandman nije prihvaćen. Rezultati glasanja su sljedeći:

Amandman I. – „za“ tri, „protiv“ 20, „suzdržanih“ 14 poslanika.

Amandman II – „za“ dva, „protiv“ 20, „suzdržanih“ 15 poslanika.

Amandman III – „za“ dva, „protiv“ 19, „suzdržanih“ 16 poslanika.

Amandman IV – „za“ tri, „protiv“ 18, „suzdržanih“ 15 poslanika.

Amandman V – „za“ tri, „protiv“ 19, „suzdržanih“ 13 poslanika.

Nakon glasanja o amandmanima prešlo se na izjašnjavanje o Prijedlogu zakona. Sa 32 glasa „za“ (Federacija BiH 22, Republika Srpska 10), dva „protiv“ i tri „suzdržana“, usvojen je Prijedlog okvirnog zakona o srednjem stručnom obrazovanju i obuci u BiH u drugom čitanju.

### **Ad. 5. Prijedlog zakona o Agenciji za identifikacione dokumente, evidenciju i razmjenu podataka BiH (drugo čitanje)**

Nakon kratkih uvodnih napomena predsjedavajućeg, u raspravi su učestvovali Šemsudin Mehmedović i Beriz Belkić.

Šemsudin Mehmedović predložio je šest amandmana. Dom nije prihvatio nijedan od predloženih amandmana. Rezultati glasanja su sljedeći:

Amandman I. – „za“ 11, „protiv“ 18, „suzdržanih“ osam poslanika,

Amandman II. - „za“ 12, „protiv“ 18, „suzdržanih“ sedam poslanika,

Amandman III. - „za“ 13, „protiv“ 17, „suzdržanih“ sedam poslanika.

Amandman IV. - „za“ 12, „protiv“ 18, „suzdržanih“ osam poslanika.

Amandman V. - „za“ 11, „protiv“ 14, „suzdržanih“ šest poslanika.

Amandman VI. - „za“ 10, „protiv“ 16, „suzdržanih“ sedam poslanika.

Prijedlog zakona o Agenciji za identifikacione dokumente, evidenciju i razmjenu podataka BiH usvojen je u drugom čitanju sa 32 glasa „za“ (Federacija BiH 21, Republika Srpska 11), jednim „protiv“ i četiri „suzdržana“.

#### **Ad. 6. Prijedlog zakona o izmjenama i dopunama Zakona o polaganju pravosudnog ispita u BiH (drugo čitanje)**

Predsjedavajući Lozančić dao je uvodne napomene, nakon kojih je kratko diskutirao Šefik Džaferović.

Sa 36 glasova „za“ (Federacija BiH 24, Republika Srpska 12), bez glasova „protiv“ i jednim „suzdržanim“ glasom, usvojen je Prijedlog zakona o izmjenama i dopunama Zakona o polaganju pravosudnog ispita u BiH u drugom čitanju.

#### **Ad. 7. Prijedlog zakona o izmjenama i dopunama Zakona o udruženjima i fondacijama BiH (prvo čitanje)**

Predsjedavajući Lozančić dao je uvodne napomene.

U raspravi su učestvovali: Milorad Živković, Vinko Zorić i zamjenik ministra pravde BiH Srđan Arnaut.

Prijedlog zakona o izmjenama i dopunama Zakona o udruženjima i fondacijama BiH usvojen je u prvom čitanju sa 32 glasa „za“ (Federacija BiH 20, Republika Srpska 12), bez glasova „protiv“ i pet „suzdržanih“.

Nakon toga glasalo se o zaključku koji je predložio Milorad Živković. „Za“ je glasalo 20 (Federacija BiH devet, Republika Srpska 11), „protiv“ 11 i tri poslanika bila su „suzdržana“.

Zbog nedovoljne entitetske većine iz Federacije BiH odmah je izvršeno usaglašavanje u Kolegiju. Kolegij je postigao saglasnost i predsjedavajući Lozančić konstatirao je da je usvojen sljedeći zaključak Milorada Živkovića:

**„Zadužuje se Ministarstvo pravde BiH da izvrši reviziju dosadašnjih svojih odluka o upisivanju udruženja i fondacija u registar BiH i izvrši njihovo usklađivanje sa ovim zakonom (nakon što bude donesen).“**

#### **Ad. 8. Prijedlog zakona o graničnoj kontroli, s Mišljenjem Zajedničke komisije za odbranu i sigurnost**

Nakon uvodnih napomena predsjedavajućeg u raspravi su učestvovali: Mirko Okolić, Šefik Džaferović, Jozo Križanović, Adem Huskić, Milorad Živković i Drago Kalabić.

Negativno mišljenje Zajedničke komisije nije prihvaćeno. „Za“ je glasalo 12, „protiv“ 24 i „suzdržan“ je bio jedan poslanik. Predsjedavajući je konstatirao da se Mišljenje vraća komisiji na doradu, uz prijedlog koji je proistekao iz rasprave da komisija, u saradnji s Ministarstvom sigurnosti BiH i drugim zainteresiranim, Domu dostavi novo mišljenje nakon usaglašavanja stavova o ovom zakonu.

Kako je značajan broj klubova poslanika izrazio želju da se pokuša skratiti vrijeme trajanja sjednice zbog umora poslanika i ranije preuzetih obaveza i kako je završena rasprava o prijedlozima zakona, predsjedavajući Lozančić je, nakon konsultacija s poslanicima, iznio prijedlog Kolegija da se počne rasprava od kraja dnevnog reda, od tačke 17. pa nadalje te da se rasprava vodi do 17,45 sati, a tačke koje ne budu razmatrane da uđu u dnevni red naredne sjednice Doma. Ovaj prijedlog prihvaćen je sa 28 glasova „za“, jednim „protiv“ i tri „suzdržana“.

#### **Ad. 15. Imenovanje tri poslanika iz Predstavničkog doma u Ad hoc komisiju za provođenje procedure za imenovanje:**

**a) Nezavisnog odbora kao nezavisnog tijela policijske strukture BiH,**

**b) Odbora za žalbe građana kao nezavisnog tijela policijske strukture BiH.**

Predsjedavajući je iznio prijedlog Kolegija Doma, koji je prihvatio Prošireni kolegij, da se u ovu ad hoc komisiju imenuju: Adem Huskić, Velimir Jukić i Drago Kalabić.

Martin Raguž stavio je primjedbu na stranačku zastupljenost u ad hoc komisijama i predložio Vinka Zorića za člana ove ad hoc komisije.



Jozo Križanović također je imao primjedbu na način predlaganja članova, a Bakir Izetbegović rekao je da je ovo prijedlog Kolegija Doma koji je samo prezentiran na sjednici Kolegija u proširenom sastavu.

Primjedbe na način izbora Ad hoc komisije iznijeli su i: Mirko Okolić, Sadik Ahmetović i Momčilo Novaković, a u raspravi su učestvovali: Šefik Džaferović, Niko Lozančić, Milorad Živković, Martin Raguž, Drago Kalabić, Jozo Križanović, Azra Hadžiahmetović, Denis Bećirović i Vinko Zorić.

Prije nego što se pristupilo glasanju, kako su u raspravi predložena četiri poslanika za članove Ad hoc komisije, Velimir Jukić odustao je od kandidature.

Sa 31 glasom „za“, tri „protiv“ i tri „suzdržana“, u Ad hoc komisiju za provođenje procedure za imenovanje Nezavisnog odbora kao nezavisnog tijela policijske strukture BiH i Odbora za žalbe građana kao nezavisnog tijela policijske strukture BiH imenovani su poslanici: Adem Huskić, Drago Kalabić i Vinko Zorić.

#### **Ad. 16. Prijedlog Kluba poslanika SDA za promjene u članstvu interparlamentarnih grupa prijateljstva**

Predsjedavajući je upoznao Dom o prijedlogu Kluba SDA da se izvrše promjene u interparlamentarnim grupama. Predloženo je da se umjesto Šefika Džaferovića u Interparlamentarnu grupu prijateljstva V. – Grupa za Afriku i zemlje Bliskog Istoka za člana i predsjedavajućeg te grupe imenuje Sead Jamakosmanović. Također, Klub SDA je predložio da se Šefik Džaferović imenuje za člana u grupi VI. – Amerika, Australija, Okeanija i Japan umjesto Seada Jamakosmanovića.

Nije bilo rasprave.

Na prijedlog Kluba SDA, sa 33 glasa "za" (Federacija BiH 21, RS 12) i četiri "suzdržana", izvršene su sljedeće izmjene u članstvu interparlamentarnih grupa prijateljstva:

- Sead Jamakosmanović imenovan za člana V. grupe (za Afriku i zemlje Bliskog istoka) umjesto Šefika Džaferovića, kojem pripada i mjesto predsjedavajućeg Grupe,
- Šefik Džaferović imenovan za člana VI. grupe (Sjeverna i Južna Amerika, Australija, Okeanija i Japan) umjesto Seada Jamakosmanovića.

#### **Ad. 17. Davanje saglasnosti za ratifikaciju:**

- a) Sporazuma između Vijeća ministara BiH i Vlade Republike Makedonije o saradnji u borbi protiv terorizma, organiziranog kriminala, nelegalne trgovine narkoticima, psihotropnim supstancama i prekursorima, ilegalne migracije i ostalih krivičnih djela,
- b) Sporazuma između Vijeća ministara BiH i Vlade Republike Makedonije o readmisiji lica koja nezakonito borave,
- c) Okvirnog sporazuma između Bosne i Hercegovine i Evropskih zajednica o pravilima saradnje koja se odnosi na finansijsku pomoć EZ-a Bosni i Hercegovini u okviru realizacije pomoći kroz instrumente pretprijetne pomoći (IPA),
- d) Dvogodišnjeg sporazuma između (BCA) Bosne i Hercegovine i Regionalnog ureda Svjetske zdravstvene organizacije za Evropu 2008./2009.,
- e) Budimpeštanskog sporazuma o međunarodnom priznavanju depozita mikroorganizama radi postupka patentiranja,
- f) Protokola koji se odnosi na Madridski sporazum o međunarodnoj registraciji žigova,
- g) Konvencije o zaštiti umjetnika izvođača, proizvođača fonograma i radiodifuznih organizacija,
- h) Konvencije o zaštiti proizvođača fonograma od nedozvoljenog umnožavanja njihovih fonograma,
- i) Statuta, Općih principa i Proceduralnih pravila Komisije Codex Alimentarius,
- j) Evropske socijalne povelje (revidirana), Strazbur, 3.maja 1996. godine.

Predsjedatelj Lozančić dao je kratke napomene.

Nije bilo rasprave o ovoj tački dnevnog reda.

Predsjedavajući Lozančić predložio je da se o svim podtačkama glasa u paketu. Ovaj prijedlog prihvaćen je sa 36 glasova „za“ (Federacija BiH 25, RS 11), jedan poslanik glasao je „protiv“.

Za sve sporazume iz ove tačke saglasnost za ratifikaciju data je jednoglasno.

Zaključujući sjednicu, predsjedavajući Doma Niko Lozančić obavijestio je poslanike da je Kolegij Doma preuzeo obavezu da osigura pretpostavke za sazivanje sjednice između 16. i 20. juna 2008. radi davanja saglasnosti za ratifikaciju Sporazuma o stabilizaciji i pridruživanju, ukoliko bude dostavljen od Predsjedništva BiH i Vijeća ministara BiH. Predsjedavajući je rekao da će poslanici o sazivanju naredne sjednice Doma biti blagovremeno obaviješteni te da će u dnevni red te sjednice biti uvrštene nerealizirane tačke iz dnevnog reda ove sjednice.

Ovim je, u 18,30 sati, završena 30. sjednica Doma.

Sastavni dio Zapisnika je transkript sjednice.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Niko Lozančić**